

Malaya dan Indonesia berasal satu dan berdarah satu tetapi dengan adanya pemerintahan sekarang telah berpecah dan bagi orang-orang yang diperanakkan di sini (yang menggunakan passport British) hendak pergi ke Indonesia mesti membayar wang hangus \$44 dan wang tanggungan sebanyak \$120. Orang yang pergi ke sana telah bersungut dengan peraturan itu oleh kerana sudahlah hangus \$44 tetapi wang yang \$120 tidak boleh diterima di sini kerana wang itu mesti diterima apabila hendak keluar dari sana diganti dengan 150 Rupiah. Orang-orang tidak berpuas hati kerana wang yang diganti tak cukup sebab wang \$120 itu jika ditukar dengan wang Indonesia harganya lebih daripada 600 Rupiah. Sebenarnya perbuatan ini tidak adil – kalau diterima wang tanggungan wang Malaya maka waktu baliknya hendak dibalikkan wang Malaya juga – apa kata ahli-ahli mesyuarat di Federation dan Singapura? Apa kata jabatan “pertukaran wang” (Foreign Exchange) – Tidakkah ini bermakna menukar wang Malaya dengan wang Indonesia?

-----*-----*-----

Penerbit tafsir Al-Quran
Al-Majid “ al-Ustaz Rijal



KOPI PAHIT

Abdullah nampaknya tidak mencari jalan bagi menerbitkan tafsirnya selain daripada untuk mencari wang. Kita katakan begitu ialah kerana daripada tafsir penerbitannya itu termasuk di dalamnya berbagai-bagai amalan seperti iklan kasut. Kita belum mendapat apa hukumnya mencampurkan itu tetapi perbuatan ini telah dipandang oleh umum tidak baik dan “menghina” kepada kemuliaan Al-Quran Jamiat khabarnya telah memasukkan bantahan kepada Majlis Islam Penasihat Kerajaan supaya merafa’kan kepada kerajaan menahan perbuatan yang demikian kerana dipandang mereka sebagai suatu perbuatan “yang menghinakan”. Hal ini sebenarnya kita sendiri tidak setuju yang tafsir itu dicampur dengan iklan-iklan – semolek-moleknya biarlah tafsir itu sendiri kerana terdandang sebagai suatu perbuatan yang merendahkan darjat Al-Quran. Di sebalik itu kita hanya berkata – kalau

mahu cari duit dalam penerbitan’ carilah lain jalan, jangan menyentuh kemuliaan sesuatu yang dimuliakan umum.

-----*-----*-----

Haji Rejab seorang penulis di dalam “Suara UMNO” berkata bahawa bidasan-bidasan orang atas perkara loteri UMNO itu mengelirukan dan perbuatan yang demikian itu ialah perbuatan iblis. Siapa yang iblis belum thau – Haji Rejabkah atau orang yang membidasnyakah oleh kerana orang nampak dengan terang bahawa agama itu “tidak ada harga” kepada sebahagian besar golongan mereka itu pada hal orang yang membidas menunjukkan keterangan hukum agama tentang haramnya mengadakan loteri walaupun di dalam suara UMNO itu juga ada penulis “yang ber?” menjawab mencari dalih hendak menghalalkan barang yang haram. Kalau masih mengakui beragama Islam ikutlah hukum agama – Kalau tidak terpulung kepada mereka itu.

-----*-----*-----

Kemajuan! Kemajuan! Dan kemajuan! Itulah

sekarang yang disebut dan dikejar oleh sebahagian “pemuda dan pemuda kita’ yang bakal menjadi harapan bangsa yang setengah-setengahnya menjadi pendidik kepada anak-anak kita. Apakah kemajuan yang dapat dan dikejar mereka? Kita pandai bersandiwara, bercampur antara lelaki dengan perempuan kerana “faedah umum” – Belajar bercampur kelas antara gadis-gadis dan belia-belia dan kerana kemajuan itu selalu kita jumpai habis belajar berjalan bersama-sama dan berdua-dua melihat wayang dan kesudahannya... TS T (tahu sama tahu). Kalau ditegur dikatakan kolot dan mengagungkan kebebasan perempuan pada hal agama telah menunjukkan merbahayanya dengan terang dan tepat. Adakah kemajuan yang dibangga-banggakan itu kemajuan yang bakal membawa anak sebelum nikah? Adakah kemajuan yang dikehendaki itu supaya tiap-tiap kahwin itu dengan diadakan “romenas” dahulu? Kalau beginilah baik jangan kahwin di hadapan tuan kadi – habis perkara – Cemeti Al-Farouk.